



Iohannes ex Zeyl Franconico oppido ad Mœnum amnem sito oriundus, à pueris operam literis dedit, atque præclaram eruditionem natus fuit. Is postea sese ad magnificum Ebracum monasterium contulit, & Cisterciensium monachorum ordinem suscepit. Situm est monasterium illud in Ostrofrancis & Herbipolensi Diocœsi, quatuor miliaribus à Schuueinfordia, in ipsa ardua sylua, quæ uulgò Steygeruuald dicatur. Fundatum autem erat anno a nato Christo millesimo centesimo uicesimo sexto, sub Imperatore Lothario Saxone, & Episcopo Vuirtzburgense Embricone, à Bernone ac Richouino militibus, & nobilibus fratribus de Eborauu, qui suum castrum latrocinijs clarum in domum precationis conuerterunt. In eo loco omnium Herbipolensium Episcoporum corda corporibus executa, quatuor equis honorifice currui præpositis, auehi, & ibi in templi choro prope Dominici corporis ædiculam tumulari solent.